

*** * (بسم الله الرحمن الرحيم) * * *

الحمد لله رب العالمين والصلاة والسلام على محمد وآله اجمعين (اما
بعد فهذه مجلدة جليلة جامعة لترجمة حال خالد بن زيد الانصارى
مع بيان احوال بعض المشايخ الواصيلين الى رضاه البارى لله
در مؤلفها الامام الثالث بجامع ابى ايوب الانصارى الحافظ العالم
بوجوه قرائة القرآن وبكنوز معاني الفرقان المسمى باسم
سيد الانام المعروف بابن المرحوم زبدة المشايخ الحاج عبد الله
افندى المشار اليه بالبنان حيث اجاد بيان صحبته وضبا فته للنبي
عليه السلام ومغازيه بعده الى آخر اوانه سيما وقد وشح ديباجتها
باسم سلطاننا السلطان عبد المجيد خان ادام الله مدار دولته
واقام قوائم سلطنته وافاض به للعالمين ببركة غلبته
على عدوه آمين بحرمه النبي وآله

زيره الفقير الحقير ابراهيم لطفى البكبازارى القاضى
بمدينة ابى ايوب الانصارى
رضى عنه البارى

(* فهرست کتاب *)

۳۸ جناب حضرت خالدك	۰۳ در بیان باعث تألیف
بیعت عقبه ثانیه ده	و بیان اسم رساله
بولندقلری ورسول اکرمک	۰۷ تعداد ابواب رساله
نقباء اثنی عشر تعیین	۰۸ باب اول
بیورقلری	۰۸ فصل اول در بیان نسب
۳۸ فصل ثانی جناب حضرت	حضرت خالد
خالدك منصب مهماندارلق	۱۱ فصل ثانی در بیان قرابت
ایله کسب امتیاز بیوردقلری	شاه انبیا بحضرت خاند
بیاننده در	۱۱ شبیه الحمدك عبدالمطلب
۴۲ حضرت مشارالیه السنه	لفظیله سبب شهرتی
ناسده سنجدار رسول الله	۱۵ فصل ثالث در بیان نسب
اطلاق اولنمنسك توجیهی	اوس و خزرج
۴۵ فصل ثالث حضرت	۱۷ بیان سبب توطن اجداد
مشار الیهك عصر نبویه	انصار در مدینه منوره
ظهور یافتنه اولان مناقب	۱۸ ذکر قصه سبأ
جلیله لری بیاننده در	۳۱ شجره نسب مشارالیه
۴۵ حضرت مشار الیهك	۳۱ باب ثانی بیعت عقبات و اول
مظهدعاء جناب نبوی	حضرتك مهماندار جناب
بیوردقلری	خیرالبشر اولدقلری و بعد
۵ خوابه نیت اولندقدده وارد	الهجرت اول حضرتك
اولان دعاء مأثور	مناقب جلیله لری بیاننده
۵۱ صرمساق دینلن سبره نك	۳۴ فصل اول در بیان بیعت
حلی و کراهتی	عقبات ثلثه بوجه اجمال

- ۵۳ ختام طعامده قرأت اولمان
دعاء مأثور
- ۵۷ بیان خاصه آیت الکرسی
۶۰ بیان خاصه آخر سورة
الحشر
- ۶۱ تکثیر طعام حقیقه
حضرت مشار البهک
روایت ابتدییکی معجزه
- ۶۲ حضرت مشار البهک
لسانندن ظهور ایدن کلامه
مطابق آیت کریمه نزول
ابتدیکی
- ۶۴ جناب ام ایوبک تظلیقندن
نهی نبویک صدوری
۶۴ باب ثالث جناب حضرت
خالدک زمان نبوتد نصکره
اولان بعض مناقبی وارتحال
سعادتلری بیاننده در
- ۶۵ فصل اول مشار البهک
بعد از زمن نبوی بعض
مناقب حسنه لری بیاننده در
- ۶۶ مروان بن حکم ایله وقوع
بولان مشاجره نری وسائر ورع
آمیر حکایت حسنه لری
- ۷۰ ولاتلقوا بایدیکم آیت کریمه
سنک تفسیرنده مشار البهک
روایت اولمان اثر
- ۷۲ فصل نانی اول حضرتک
ارتحال با سعادتلرینک
قصه سی بیاننده اولدیغی
- ۷۳ حضرت مشار البهک
رومی غزالری یزید بن
معاویه ایله اولدیغینک
رحمانک پیانی
- ۷۵ قصه پرغصه ارتحال
حضرت مشار البهک
۷۷ ارتحال مشار البهک
ظهور یافته اولان کراماتدن
بربنده نب پیانی
- ۷۷ باب رابع قبر حضرت مشار
البهک فتح در سعادت قدر
نوجهله اولدیغی وحین
فتحه ظاهرینک
کیفیتی بیاننده در
- ۷۸ فصل اول قبل الفتح مشهد
حضرت مشار البهک
نوجهله اولدیغی بیاننده در

- ۸۱ فصل ثانی حین فتح
در علینده مشهد حضرت
مشار الیهک ظهورینک
کیفیتی بیاننده در
- ۸۴ جناب فاتحک مکاشفه
شیحی تحقیق بیوردقلری
۸۷ باب خامس سلاطین
عثمانیه خضراتک مشهد
حضرت خالدہ اختراما
موفق بیوردقلری خیرات
ومبرات بیاننده در
- ۸۷ فصل اول زمان فاتحدن
ناعصر محمود خان ثانی به
کنجه سلاطین عظامک
خیرات وحسناتی بیاننده
اولدیغی
- ۸۷ بیان خیرات جناب فاتح
بمشهد حضرت مشار الیه
۸۹ لیاالی احیناده تربہ
شریفه نک کشاد اولمنسک
اساسی
- ۹۱ بیان انتساب سلطان بازید
ولی بروحانیه حضرت
مشار الیه و بیان تقلد سیف
- ۹۲ سلطان مراد خان ثالث
حضرت تلرینک حضرت
مشار الیه و عیبه انتسابلری
۹۲ سلطان محمد خان ثالث
حضرت تلرینک روح
حضرت مشار الیه و وجه
انتسابلری
- ۹۳ سلطان احمد اول
حضرت تلرینک مشهد
حضرت مشار الیه و
آثار حسنہ لری
- ۹۵ سلطان عثمان ثانی
وسلطان مراد رابع
وسلطان ابراہیم
حضرت اتک آثار جبیلہ لری
- ۹۶ سلطان احمد ثالث
حضرت تلرینک تربہ
شریفہ دہ مصحف
شریفدن تفأول
بیوردقلری
- ۹۷ تجدید منارہ جامع
حضرت مشار الیه
۹۷ تربہ شریفہ به اثر قدم
شریف وضع اولندیغی


۹۸ سلطان مصطفی خان ثالث حضرت تکرینک اثر خیرلی	۱۰۵ تعمیر اول در عصر پادشاه مشار الیه
۹۸ سلطان عبدالحمید خان علیه الرحمۃ والغفران حضرت تکرینک مشہد حضرت مشار الیہدہ اولان اثر جبللری	۱۰۶ انشاء تخت ہمایون در تربۃ شریفہ
۹۹ سلطان سلیم خان ثالث حضرت تکرینک جامع حضرت مشار الیہی وشبکہ مشہد منوری تجدید پیوردقلری وخیرات سارہ لری	۱۰۷ تعمیر ثانی وخیرات ومبرات سارہ در زمان پادشاه میرور
۱۰۲ وضع مصحف شریف در تربۃ شریفہ و بناہ سقف در مواجہہ	۱۰۸ ذکر خیر جبلیل ضم وظائف
۱۰۴ فصل ثانی خداوندکار سابق علیہ رحمۃ الملک الخالق حضرت تکرینک مشہد حضرت مشار الیہ احتراما موفقی پیوردقلری خیرات ومبرات بیانندہ در	۱۰۹ ختام تعمیر وکساد جامع لازم التوقیر
	۱۱۰ کسوة حجرہ نبویہ نک تربۃ شریفہ دہ مکث پیورادینچی
	۱۱۲ مقامات ثلاثہ مبارکہ دہ شفاء شریف قرائت اولنق تدبیر حسنک بیانی
	۱۱۴ باب سادس اول حضرتک مشہد منورلرینک آداب زیارتی بیانندہ در
	۱۱۴ فصل اول مطلقا زیارت قبورک حکم شرعی وآداب مشروعه سنک اجالا بیانندہ در

۱۲۸ ذکر جمیل الشیخ	۱۱۶ بیان آداب زیارت قبور
نصوحی الخلوئی الشعبانی	۱۱۹ بعض صوفیه
۱۲۹ ذکر جمیل عبدالله افندی	مئشر عینک زیارت
شیخ زاویه قره باش	قبورده دأب حسنه لری
۱۲۹ ذکر جمیل یحیی زاده	۱۲۲ فصل تانی خاصه جناب
افندی	حضرت خالدك مشهد
۱۳۰ ذکر جمیل الحاج	عالیرینك آداب زیارتی
فیض الله افندی	بیاننده در
۱۳۲ ذکر جمیل الحاج ملک	۱۲۴ باب سابع اول بقعه
افندی	مباركك خدامندن
۱۳۳ ذکر جمیل قاسم پاشالی	بعض مظنه كرامك ترجمه
احمد افندی	احوالی بیاننده در
۱۳۴ ذکر جمیل کوچك امیر	۱۲۴ فصل اول جامع حضرت
افندی	مشار الیهك مشایخندن
۱۳۶ فصل تانی جامع حضرت	ومدرسه لطیفه نك
مشار الیهك ائمه وخطبا	مدرسبندن بعض ذواتك
سندن بعض ذواتك	ترجمه احوالی بیاننده در
اذکار جمیله سی بیاننده	۱۲۴ ذکر جمیل تیروی
۱۳۶ ذکر جمیل ابوالمواهب	عمر افندی
الخطیب	۱۲۵ ذکر جمیل مفتاحی زاده
۱۳۷ ذکر جمیل احمد المسیری	۱۲۶ ذکر جمیل عبدالرزاق
۱۳۸ ذکر جمیل خطیب	افندی
مصطفی افندی	۱۲۶ ذکر جمیل ایوب شیخی
۱۳۸ ذکر جمیل بالطه جی	یحیی افندی
افندی	

- | | |
|-------------------------|--------------------------|
| ۱۴۹ ذکر جمیل والد مرحوم | ۱۵۱ ذکر جمیل ملک حافظ |
| ۱۴۳ فصل ثالث جناب شفیع | افندی |
| رومک تربہ دار لرندن بعض | ۱۵۳ فصل رابع جناب |
| ذواتک مناقب حسنہ لری | مہماندار خیر البشرک جامع |
| 'بیانندہ در | شریفندہ مؤذن اولان |
| ۱۴۳ ذکر جمیل بابا یوسف | ذواتدن بعض اعزہ نک بیان |
| بیرامی قدسہ السامی | احوالی بیانندہ در |
| ۱۴۷ ذکر جمیل عبد الخالق | ۱۵۳ ذکر جمیل عبد الغنی |
| افندی | افندی |
| ۱۴۸ ذکر جمیل الشیخ محمد | ۱۵۴ ذکر جمیل رضا افندی |
| امین توقادی | ۱۵۵ تاریخ ختم الکتاب |
| ۱۴۶ ذکر جمیل نعلی زادہ | ۱۵۷ مناجات بدر گاہ قاضی |
| افندی | الجساجات |

(* مأخذ رساله اولان كتب (*

١. الاصابة في اسماء الصحابة ١١ رسالة بحبي افندي
 لابن حجر العسقلاني في مناقب توفادي امين
 ٢. انسان العيون في سيرة الامين افندي
 المأمون لعلي الحلبي ٣. روضة الاحباب
 ٣. ترجمة شرح سير كبير ١٣ سلسلة تامة
 لمنيب افندي ١٤ سير كبير للامام محمد الشيباني
 ٤. تاريخ واصف افندي ١٥ شرح ديوان مرتضى
 ٥. خلاصة تفسير العرائس كرم الله وجهه لمستقيم زاده
 ٦. خلاصة الوفا في تاريخ ١٦ شرح طريقت محمدية
 مدينة المصطفى صلى الله
 عليه وسلم للامام ١٧ شرعة الاسلام
 بالتركي
 السمهودي ١٨ شقايق نعمانية
 ٧. خلاصة هدية الاخوان ١٩ صفة الصفة لابن الجوزي
 لمستقيم زاده ٢٠ مرشد الطلبة
 ٨. ذيل شقايق للشينجي ٢١ مشكوة المصابيح
 ٩. رسالة عبدالرزاق افندي ٢٢ نفحات العبير الساري في
 ١٠ رسالة مستقيم زاده احاديث ابى ابوب الانصاري



(الانارالمجيدية في المناقب الخالدية)

(** * * بسم الله الرحمن الرحيم * * *)

حمد بی پایان و شکر فراوان اول خلاق جهان و اول رزاق
 كافة عالمیان جل ذكره حضرت تیرینک ذات سرمدی صفاتنه
 سزا و شایاندر که نوع بشری (خلق الانسان من علق)
 نظم منبغی مصداقجه کجینه عدمدن فضاء وجوده ابراز
 و بر منطوق (اوجعلناکم شعوبا و قبائل لتعارفوا) بهرینی
 بر شعبه دن منشعب و هر فردنی بر اصل اصیله منسب اولغله
 دیگرندن ممتاز بیوردی مع هذا ابتداء آفرینشدن تا بروز قیام
 هر قرن و عصرده سکنه زمین بیننده حکمتده مطابق و مقتضای
 وقته موافق اوله رق حسن سیاسته مقتدر و مبان اسلامیانده
 اجرای قوانین شریعت و ایفای لوازم خلافت ایده رک
 تدابیر مقتضیه حسنه ایله مدبر خلفاء ذوی النهی نصب و تعیین
 بیوروب بونی مؤید فرقان حکیمنده (هو الذی جعلکم خلایف
 فی الارض) بیوردی (و درود صد هزار و نجات بی شمار اول سرور

انبیاء و رهبر اصفیاء پیشوای مرسلین و رهنمای متقین نور
 دیده جمیع امم و پسندیده نوع بنی آدم نبی اعلم رسول افخم
 حبیب مکرم شفیع پروفا ملجأ جمیع ضعفا یعنی به حضرت ابی
 القاسم محمد المصطفی علیه الصلوات الزکیات والتسلیم الاوفی
 حضرت لریک قبله گاه عاشقین و ضراعتکاد عامه متوسلین اولان
 روضه طاهره و عتبه زاهره لرینه بلا انقطاع فیضان و توارد
 اینسونلر که ذات رسالتما بلرینی لایق بیه توصیف طوق بشردن
 خارج و حقیقت کنسه محبویت بلرینی درک و تعریف حضیض
 امکاندن اوج عجز و انصاته عارج اولوب قصیده برده صاحبک
 بیت (فانسب الی ذاته ماشئت من شرف)
 (وانسب الی قدره ماشئت من عظم)

قولنده بو حکم مندر جدر (وآل و اولاد و ازواج و اصحاب و اتباع
 و انصار و اعوان و اشباع حضراتنه دخی بالتبع تعاقب و تناثر
 اینسونلر که انلرک نظواهری کال اتباع امام الانبیاء الیه محلی و بواطنی
 انوار تخلیق خیر الوری ایله محلی اولوب هر بری بو دین قوبنده
 بر مقتدای پرتمکین و بهری اهل توحیددن بر طائفه نک ملجأ
 و پناهی اولوب درگاه الهی بدن رجاء اسعاف حاجاتده توسلکاه زوار
 مخلصین اولمشلردر (غبذا خواص اصحاب رسول اکرم و قدماء
 انصار حبیب محترم صلی و سلم علیه خالق الامم دن اولوب
 فرقه بنی التجارک کزیده سی و زمره انصارک پسندیده سی ذات
 نبوت اب پیغمبرینک مهمانداری و شترخیر البشرک موقف و مقری
 یعنی به حضرت ابی ایوب الانصاری علیه اکمل رضوان ربه
 الباری حضرت لرینه نسبت ایله کسب شرف و شان ایدن جامع

ما نند کلزار جنان و معبد منیف مجمع مخلصانده من غیر حد خدمت
 امامتله و اصل مزید شرف و افتخار و سرای کبیرهما یون بهشت
 آساده خدمت جلیله شیخ القراق ایله نائل الطاف بی شمار
 و بین الخلان مرحوم الحاج عبدالله افندی زاده دینکله شهرت شعار
 اولان عبدیقمدار و عاجز باقصور بسیار محمد امین منحه الله بامداد
 حییه الامین اول جوار ساطع الانوارده نظم قرآن کریمی
 و وجوه سبعه بی اقرء و تعلیم و بعض طالبینه بعض علوم نافعہ بی
 هزار عجز و اعتراف برله تدریس و تفهیم ایله اشتغال و دعاء
 ازدیاد دوام عمر و دولت و اقبال پادشاه زمان باینده درگاه خدایه
 تضرع و ابتهال اوزره اولوب بوندن اقدم علم خط و املا دن تحفة
 الطلاب نام ارجوزه موجزه تک کشف النقاب اسمنده اولان
 شرح لطیف عربی سنی زبان ترکی اوزره ترجمه و بضاعة الکتاب
 اسمیله تسمیه ایدوب اول اوانده پادشاه جهان اولوب قریب
 العهد ده اجداد و اسلاف ذوی الفضائله لاحق اولان
 خداوند کار سابق جنتمکان خلد آشیان و اصل رحمت یزدان
 مغفرت نشان المرحوم المبرور غازی سلطان محمود خان صبت
 علیه مجال الرحمة و الغفران حضرت تکرینک حضور ینبوع
 النور لینه عرض و تقدیم ایلیک خصوصنده تردد اوزره ایکن
 اول پادشاه دل آگاه ندای ارجعی په نگاه بیوروب روح پرفتوح لری
 عازم زهتگاه قرب اله اولدقده بو عبد بانس اول امنه دن بر موجب
 شیوه قدر آیس اولوب شب و روز (عسی ربنا ان یدلنا خیرا منها)
 آیت کریمه سنی یاد و تذکار و همه آن (بیت) * ایله قطع امید فیض
 خدادنکه انک * درینه یوز سورن البت ابریشور مقصدنه * یتنی

تکرار

تکرار ایدرکن آثار مزید فضل و عنایت الهیه بر یوزدن دخی بروز
ایلیوب پادشاه زمان و شهنشاہ معدلت عنوان سلطان سلاطین
جهان و خاقان خواقین اوان شرفبخشای سریر خاقانی و نور
افزای افتاب فلک عثمانی اختر نیر برج خلافت و کوهر کنجینه
معدلت ولی نعمت ککافه بندکان و مردمک چشم اسلامیان
باعث امنیت سکنه بلاد و حامی و ناصر عامه عباد امام فرقه
موحدین و سبب نظام احوال قطنه زمین الموفق من قبل الملك
المعین و المؤید بالفتح المبین ظل ظلیل فاطر المقلین خلیفه جناب شاه
کونین المقتخر بخدمه الحرمین الشریفین السلطان ابن السلطان
ابن السلطان (السلطان عبدالمجید خان) ابن السلطان الغازی
محمود خان ابن السلطان الغازی عبد الحمید خان ادامہ الله فی
سریر سلطنته الی آخر الدوران و اقام ظله علی رعیتہ ما اختلف
الملوان افندیمر حضرتلری مسند والای خلافت عظمایہ بالعرز
والاقبال صعود و منصه منصب بالای سلطنت کبرایہ بالامن
و البرکة و السعادة و الاجلال قعود بیوروب اول سریر عدالت
مصیر ذات خلافتسماتلریله مزین و مرصع و صحائف قلوب
موحدینده منشور فرج و شادمانی مطبوع و موقع اولوب اول
روز مسعودک اون برنجی یوم خجسته عامه سکنه در سعادتہ عرض
دیدار و انفاق عطایای بسیار و دیدنه حسنه سلاطین عثمانیان
اوزره تقلد سیف قاتون محاسن مشحونتی اجرا ایله اقتضای
آثار اسلاف کرام و اختیار نیت خیریه سیله ساحلسرای همایونارندن
باشوکت و سلطنت اشرف بقاع بلادروم اولان مشهد مبارک
حضرت ابی ایوب الانصاری لازال محفوظا برضوان الباری

حضرت لرینی تشریف بیوروب بو بنده عاجز دخی بر مقتضای
 خدمت جلیله امامت اول مجمع والاده حضور ایله شرفیاب و خلیفه
 زمانک مرقد منور حضرت خالده اولان کمال تعظیم و توقیر لرینی
 دیده سر ایله معاینه یه رهیاب اولوب جانب روحانیت مهماندار
 پیغمبریه قلب شاهانه لرنده مرکوز و مستحکم اولان رشته محبت
 کامله نک آثار بنی رأی العین بو بنده ناچیز مشاهده ایلد کده درون
 عاجزیده التماس ایدن شراره حزن و الم اوزرینه ینا بیع زلال
 سرور و شادمانی متوارد و جناب شهنشاه نیکخصلات و پادشاه
 والامنقبت علیه فیوضات ربه دامت افندیمن حضرت لرینه ازل
 و جان متحتم اولان کمال محبت و عبودیت قات اندر قات متراید اولوب
 (الهدیه علی قدر مهدیهها) فحوا سنجه عتبه فلك رتبه
 تاجدار بلریند بو بنده ماند مور لرندن هر نه قدر تقدیمه شایان
 دکل ایسه ده عجز و قصور نامحصوره اعتراف و بساتین مناقب
 اصحاب جلیله المناقیدن ثمرات متنوعه اجتناب و اقتطاف ایده رک
 عصاة رومک پناه و ملجاء و زوار اخلاص شعارک شفیع و منجائی
 جناب خاندکان رضوان ربه علیه عائد افندیمن حضرت لرینک
 بعض مناقب حسنه لرینی حاوی و سلاطین کذشتکان علیهم
 الرحمة والغفران حضرت لرندن اول بقعه مبارکه یه کمال محبت
 و رعایتده قنغی ذوات عظامک خیرات احترام آیات لرینی تصحیح کرده
 روایت اولد یسه انلرک بیانی محتوی بر قاچ ورقدن عبارت بر رساله
 ترتیبی تنسیب و رساله مذکور ه بی جناب مقتدای انام علیه الصلوة
 والسلام افندیمن حضرت لرینک منزل مبارک جناب حضرت خالده
 مدت مکث و اقامت پیغمبر لرینی اولان هفت ماهک عددیند اقیقاء

يدى باب اوزر ينه تبويب ونام على جناب امام المسلمين افنديم
 حضرت تليبه تبرك و تيم اولنديغنه ابتداء اسم سامبسى (الاثار
 الجيدية فى المناقب الجالديه) ايله تسميه اولنقى تصميم وتصويب
 اولندي (وما توفيتى الا بالله عليه توكلت واليه ائيب) باب اول
 جناب حضرت خالدك نسب سعادتلىرى و جناب سرورانام عليه
 الصلوة والسلام افنديم حضرت تليبه وجه قرابتلىرى وزمره
 انصار عليهم الرضوان المدرار افنديلريمز حضرتك جدا اهللىرى
 اولان اوس بو خردج نام دو برادر ك تا جناب آدم عليه صلوات
 بارى الامم حضرت تليبه وارنجيه نسللىرى ومدينه طاهره ده
 نوطنلىرىك عبادى وسيللىرى بياننده اولوب بو باب اوچ فصللى
 مشملدر (باب ثانى بيعت عقبات ثلثه تك اجمالا كيفيتى و اول حضرتك
 مهماندار جناب خير البشر اولوب اول منصب بالابى احراز
 بيوردقلىرى وهجرت باسعادت نبويه دن تا ذات رسالتاب افنديم
 حضرت تليرى روضه افضل الرياضلىرىنده اختيار انزوا بيوردقلىرىنه
 قدر حضور پر نور محمدىده ومعيت جناب احمدىده حضرت
 مشار اليهك ظهور يافته اولان خدمات جليله لى بياننده اولوب
 بو باب دى كذاك اوچ فصللى شاملدر (باب ثالث جناب حضرت
 خالدك زمان سعادت جناب فخر انبياد نصره وقوع يافته اولان
 بعض مناقب جليله لى بياننده اولوب بو باب انجق ايكى فصل
 اوزر ينه اولغه قابلدر (باب رابع حين فتح بلده عظيمه
 قسطنطينيه ده مشهود معطر حضرت خالدك ظهورىك كيفيتى
 بياننده اولوب ايكى فصل اوزر ينه اوله رقى باب ثالثه مماثلدر (باب
 خامس سلاطين ماضيه عثمانيه متعهم الله تعالى فى قبورهم بالنعيم

الجنانية حضرتان دن اول بقعة پراتوار ساطعه به کمال تعظیم
 واحترام ایدہ رک قاج پادشاہ دل آکاکہک موفق اولدقاری خیرات
 ومبرات قارعة سمع فقیر ومشاہد دیدہ عاجز پرتقصیر اولدی ایسه
 انلرک بیانده اولوب بو بابده دخی ایکی فصل متحصلدر (باب
 سادس اول حضرتک مشہد منورلرینک آداب زیارتی ولوازم
 تعظیبات وتکریماتی بیانده اولوب بو باب دخی ککذک ایکی
 فصل اوزره اولغه متحصلدر (باب سابع اول بقعة مبارکة
 لامعہ نک خدام وملازمیندن اولوب بعض مظنہ ومشاہیردن
 اولان ذواتک ترجمہ احوالی بیانده اولوب بو باب درت
 فصل اوزرینہ اولهرق ابواب رسالہ بی تمم ومکملدر

(*) باب اول (*)

جناب حضرت خالدک نسب سعادتلری وجناب سرورانام علیہ
 الصلوٰۃ والسلام افندیمز حضرتلریله وجد قرابتلری وزمرہ انصار
 علیہم الرضوان المدرار افندیلریمز حضرتک جد اعلالی
 اولان اوس وخزرج نام دو برادرک تاجناب آدم علیہ صلوات باری
 الامم حضرتلرینہ وارنجہ نسبلی ومدينة طاهرہ توطنلرینک
 مبادی وسبیلری بیانده اولوب بو باب اوج فصلی مشتملدر

(*) فصل اول (*)

جناب حضرت خالدک نسب سعادتلری بیانده در مشار الیہ
 حضرتلرینک نسب سعادتلرینی اجلہ ائمہ حدیثدن ابن حجر
 عسقلانی وخلاصۃ الوفا فی تاریخ مدینة المصطفی صلی وسلم
 علی قاطنہا عالم السر والاخفی مؤلفی امام سمهودی وائمه

حديث وسيرك موثوق ومسندى شول وجهله على الوفاق
 بيانده اتساق كلام ايتديلر كه جناب موسى الیه دام رضوان الله عليه
 حضرتلری ایوب اسمنده اولان اکبر اولاد لر ينك اسميله بر مقتضای
 دأب قبائل عرب تکئی پیوروب ایوب کسینه مبارک سینه کسینه دار
 واصل اسم عالیبری خالد اولوب لکن بین المحدثین کسینه لر یله
 شهرت شعار اولمشلردر و پدر لر ينك اسمی زید اولوب انک دخی
 پدری کلب انک پدری دخی ثعلبه انک پدری عبد عوف انک پدری
 غنم و علی روایة چشم اولوب انک پدری مالک انک دخی پدری
 نجاردر که فصل ثابده مفصلا سرد و بیان اولندیغی اوزره نسب
 سلطان انبیاء علیه اکمل النجایا یله نسب حضرت خالدک ملتقاسی
 و بنی خزرجدن اهالی مدینه میانده بنی النجار دینکله مشهور
 اولنلرک جد اعلا سیدر و دخی نجارک پدری ثعلبه انک دخی پدری
 عمرو اولوب انک دخی پدری سر قبیله انصار خزرجین اولان
 خزرجدر که انک و برادری اوسک بیان نسلبری ان شاء الله تعالی
 فصل ثالثه ذکر و تصریح اولنور و دخی بعض مورخین ثعلبه یله
 عبد عوف پینده عمر و اسمنده بر کچمه اثبات و ثعلبه بن عمرو بن
 عبد عوف دیو بیانده اظهار ثبات ایتمشلردر بودخی خنی قائمیه که
 جناب حضرت خالدک مادر لر ينك اسمی هند اولوب انک پدری
 ربیعہ وانک پدری کعب وانک پدری عمرو اولوب انک دخی
 پدری امری القیس نام کچمه انک دخی پدری ثعلبه که اول دخی
 سابق الذکر خزرجک اولادندن کعب بن خزرجک اوغلیدر
 بوصورته جناب حضرت خالد علیه رحمة الماجد حضرتلری
 پدر و مادرلری جهتنسندن خزرجی اولدقلری هو ویدادر و دخی

پوشیده رکاب که صحابه کزین علیهم رضوان الملک المعین حضراتی
 ائمه حدیث و سیر میاننده من حیث الاعتبار صنوف متنوعه
 و طبقات منشعبه به منقسم اولدیله رایسه ده مانحن فیهد نظر ایکی
 صنف پسندیده به منحصر در دینلرک قوی التزام اولنوب حضرات
 مشارالیه ایکی صنف اوزرینه در دیوقیح کلام اولندی (صنف
 اول کرك نسل قریشدن و کرك سلانه سائره دن نفس بلده مبارکه
 مکه ده و دکرک قرب حرم اللهده اولان بلاد و قرا و بوادیده
 استیطان اوزره ایکن بعثت جناب خاتم الانبیا بدیدا اولدقده اتباع
 امام الانبیا به مسابقت ایله قدما اهل ایمان اولوب هجرت باسعادت
 نبویه دنص کره دخی ترک دیار و اموال و اوطان وزیر جناح ملجأ
 انامده تحصن بیوره رق نصرت و اعانت دین قویمه بذل مال
 و جان بیورن ذوات اعلامدر که انلره مهاجرین اطلاق اولنور
 (صنف ثانی ان شاء الله تعالی باب ثانیده بیاننه اشارت اولندیغی
 اوزره بیعت عقبه اولی و ثانیه و ثالثه ده بولنوب یاخود بعد الهجره
 کرك سلانه اوس و خزرجدن و کرك قبائل سائره دن اهالی مدینه
 منوره و سکان اطراف بلده مطهره دن اوله رق ذات نبوتسماته
 کمال محبتندن و زمره مهاجرین حضراتنه از دیادمودتندن کرك
 پیغمبر و الاشان و کرك مهاجرین خلوصکارانی بلده لینه دعوت
 و ایوا و نصرتلرنده بذل مقدرت و دیار و بساتین و اموال لرینی
 ایثار و فدا ایله کسب مزید سعادت بیورن حضرات کرامدر که
 انلره انصار دینلرک میان اسلامیانده علی الاتفاقدر فعلی هذا
 مهاجریندن اولان اصحاب عظامه مهاجرینی و زمره انصاردن
 اولان ذوات ذوی الاحترامه انصاری دینلرک تحقق ایدنجه جناب

عالی‌نصاب حضرت خالد رضی عنه ربه الواحد حضرت تریزیه
 دخی انصاری دینک متحتم وانصاری اولان ذوات معالیسماتدن
 نسبی اوسه پیوسته اولنره اوسی ونسل خزر جدن ظهور یافته
 اولان یاران سید الساداته خزر جی دییه رک یاد وتذکار
 اولنمق تعظیم شانلرینی مستلزم اولدیغی شک ومرادن
 سالم اولنجه حضرت مشار الیهک اسم و نسب و قبیلله
 وکنیه واقب وشهرت لری بردن ذکر وایراد اولنمق
 مراد اولندقدده خالد بن زید ابو ایوب الانصاری الخزر جی
 ذکر وامللا اولنمق مستنبط ومنفهمدر

(* فصل ثانی (*

جناب سرور انام علیه الصلوة والسلام افندیمن حضرت لریله
 حضرت مشار الیهک وجه قرابت لری بیاننده در امام سمهودی
 وائمة سائرین علیهم رحمة الملك المعین حضراتی شول وجهله
 بیان ایتشدر که جناب ختم الانبیاء علیه اکل التحایا حضرت لرینک
 جد ثانی لری هاشم بن عبدمناف بردفعه لمصلحة جانب مدینه یه
 عازم اولوب بالاده بیان اولنسان سرقبیلله بنی النجار وجد عالی
 جناب خالد بن زید اولان نجارک اولادندن عدی نام کچسه نک
 غنم اسمنده اوغلینک غانم نام فرزندینک اوغلی اووب خدش نام
 کچسه نک لیبید اسمنده اولان اوغلینک اوغلی زیدک فرزند
 عمروک کریمه سی سما نام خاتونی سالف الذکر هاشم اول اثنا ده
 تزوج ایدوب اندن جد جناب پیغمبری اولوب شبیه الجسد
 اسمیله نامدار وعبید المطلب وصفیله وصفدار اولان ذات
 ستوده صفات تولد ایتشدر مومی الیهک اسم سابعسی اولان

شبیه الحمد اوزرینه عبدالمطلب وصفنک وجه غلبه سنی ائمه
 سیر و حدیث شول و جمله املا و تحدیث ابتدیلر که وجوه اهل
 مکه دن اولوب نورانور محمدی به جینی محل اولغه سزایوریلان
 هاشم سلای نچسار به بی حین تزوجنده اول وقتده معتبر اوله رق
 طرفیندن قبولی حاوی شول شرطله تزوج ایندیکه اگر بر ذریت
 بدید اولورایسه اول و اولدوالده سیله مدینه ده ایقا اولنه پس
 یوشرطله مناکحه تنظیم و قبل الزفاف هاشم جانب شامه کیدوب
 بعده عودت ابتد کده امر زفاف دخی تمیم اولنوب هاشم زوجه سی
 سلای کنندیکن وطن اصلبسی اولان مکه مکرمه به کتوروب
 انده مقیم اولس ایدی چوق کچمدین سلمانک حلی هویدا
 بو و تقدیرجه سلمانک مدینه به نقل اولنسی شرط سابقه پناه
 لازم الایفا اولوب هاشم زوجه سی سلای مدینه به وقوم و قبیله سنه
 ایصال و کندوسی تجارت ضمننده جانب شامه شد رحل ایدوب
 اثناء راهده غزه نام بلده معروفده بکرمی و علی قول بکرمی
 درت و قول دیگره نظرا بکرمی بش یا شنده ایکن ترک احباب
 و اولاد و اموال و دار بقایه انتقال ایلدی بو روایت انسان
 العیون نام سیرک مؤلفی علی الحللی حضر تلرینک ترجیح کرده سیدر
 بعده عبدالمطلب مادری یاننده و قبیله بنی النجار میاننده نشأت
 ایدوب سنی یدی یا خود سکره و اصل اولدوقده بر کون عبدالمطلب
 اطفال مدینه دن بر بلوک اقرایله مسابقه و مناضله ایدر ایکن
 اول اوانده حسب المصلحه اهالی مکه دن مدینه به ورود ایتمش
 بولنان کساندن بر قاج کپسه میان اسواقده کشت و کذار ایده رک
 اطفال مز بورونک اولدقلری محله کلوب بونلری سیر و تماشا ایدرلر